



Kystverket
Postboks 1502
6025 ÅLESUND

Saksbehandlar, innvalstelefon
Bjarne Otnes, 71 25 85 75

Svinøya naturreservat – Herøy Løyve til ombygging til hybriddrift - Svinøy fyrstasjon

Statsforvaltaren i Møre og Romsdal viser til søknad av 17.06.2021.

Søknaden

Det er søkt om å sette opp eit solcellepanel på om lag 2 meter høgde og 8 meter lengde like aust for fyret på Svinøya, og legge ein jordkabel på om lag 30 meter på sørsida av fyret til maskinhuset vest for fyret. Det er også søkt om helikopterflyging i samband med utbygginga. Formålet er å bygge om fyret til hybriddrift, noko som vil gi mindre bruk av dieselaggregat og redusere utslepp og støy. Søknaden inneheld ikkje opplysningar om kor tid utbygginga skal gjennomførast, men på førespurnad svarer Kystverket at planlagt tidspunkt er august, over ein periode på to til tre veker.

Lovgrunnlag

Søknaden er vurdert opp mot gjeldande verneforskrift for Svinøya naturreservat, fastsett ved kongeleg resolusjon 28.05.2010, sist endra 28.04.2016 (FOR-2016-04-28-448).

Etter § 3, andre ledd nr. 3 er det forbod mot m.a. oppføring av bygningar og anlegg, og framføring av jord- og luftkablar. Det er vidare forbod mot ferdsel på land i perioden 1. mai til 31. juli (§ 5, andre ledd nr. 1, og start og landing av luftfartøy og lågtflyging under 300 meter (§ 5, andre ledd nr. 2).

Utbygginga fell ikkje under dei generelle unntaka i § 4 eller unntaka for ferdsel i § 5 for drift og vedlikehald av Kystverket sine anlegg. Tiltaket kjem heller ikkje inn under dispensasjonen av 20.02.2017 for helikoptertrafikk knytt til drift og vedlikehald som Kystverket viser til i søknaden.

Etter § 7 nr. 1 kan Statsforvaltaren gi løyve til oppføring av nye anlegg, flytting av anlegg, og tilbygg til eksisterande anlegg for Kystverket. Vidare kan vi etter § 7 nr. 3 gi løyve til nødvendig luftfart i forbindelse med aktivitetar etter § 7 nr. 1.

Søknaden må også vurderast etter prinsippa i naturmangfaldlova (nml) §§ 8-12, jf. § 7. Prinsippa omfattar vurdering av kunnskapsgrunnlag (§ 8), føre-var-omsyn (§ 9), samla belastning (§ 10), kostnader for å hindre skade på naturmangfald (§ 11) og miljøforsvarleg teknikk/driftsmetode (§ 12).



Statsforvaltaren si vurdering

Formålet med Svinøya naturreservat er å ta vare på eit område som har særskilt verdi for biologisk mangfald og som inneheld trua, sjeldsynt og sårbar natur. Området er ei lita tilnærma urørt øy langt til havs, som med sjøområda omkring og naturleg tilhøyrande plante- og dyreliv, utgjør ein viktig hekkelokalitet for sjøfugl som blant anna lunde, raudnebbterne, måker, og toppskarv. Området skil seg og ut ved sin økologiske funksjon blant anna som rasteplass for fugl på trekk langs kysten.

Statsforvaltaren ser positivt på at fyret blir bygd om til hybriddrift. Det vil bidra til mindre forbruk av fossilt brensel, og lokalt gi redusert utslepp av eksos og mindre belastning av støy. Dette vil vere til gode for naturverdiane på Svinøya. Vi ser også at tiltaket er plassert tett på eksisterande anlegg og rører ved eit lite areal på Svinøya.

Det vesentlege i saka er etter dette korleis utbygginga kan gjennomførast utan at det forstyrrar sjøfugl. For å skjerme den viktigaste hekkeperioden er det forbod mot ferdsel på Svinøya i perioden 1. mai til 31. juli. I forkant av denne perioden er det også lite ønskeleg med aktivitet som kan forstyrre fugl som førebur etablering på hekkelassane. Kystverket har innretta gjennomføringa til dette.

På Svinøya hekkar det havsvale. Kolonien er rekna å ligge mellom 100-200 par. Havsvale er nattaktiv i hekkeloloniane, og hekkar difor seinare på året enn annan sjøfugl, generelt i perioden juli-november. Reira er plassert i jordhøler, steinur og i bergsprekker. Havsvale er vurdert av Artsdatabanken til å ha ein livskraftig (LC) bestand på under 10 000 par (2015) på strekninga Runde-Gjesvær i Noreg.

For å kunne gjennomføre utbygginga i ei årstid som gir rimelege vêr- og lysforhold er det vanskeleg å unngå perioden havsvalene hekkar. Statsforvaltaren legg til grunn at helikoptertransport og arbeid på staden vil skje på dagtid når havsvala ikkje er aktiv. Dette bidrar til å redusere forstyrringar og negative verknader av helikoptertrafikk og aktivitet ved fyret. Vi har ikkje detaljkunnskap om fordelinga av hekkelassar på Svinøya, men steinbrotet vest for fyret er ein mykje brukt fangstplass ved ringmerking av havsvale, saman med grasbakkane nordvest og vest av fyret. Ornitologisk fagmiljø ringmerkar havsvale på Svinøya kvar sesong, og overvakinga vil kunne gi oss kunnskap om utbyggingsaktiviteten har påverka hekkesuksessen.

Ut i frå dette meiner Statsforvaltaren at utbygging som omsøkt inkludert helikoptertrafikk i perioden 1. august 2021 til 1. mars 2022 vil kunne skje utan at det strir vesentleg mot verneformålet, og at naturverdiane ikkje blir påverka i vesentleg grad. Eventuelle forstyrringar av havsvale vil ikkje true bestanden lokalt, regionalt eller nasjonalt, jf. nml 10. Vi reknar kunnskapsgrunnlaget for å vere tilstrekkeleg til å fatte vedtak, jf. nml § 8. Føre-var-prinsippet får lite vekt (nml § 9). For å minimere forstyrringane på naturmiljøet er det sett vilkår i vedtaket, jf. nml §§ 11 og 12.

Vedtak

Statsforvaltaren i Møre og Romsdal gir Kystverket løyve til å sette opp solcellepanel og legge jordkabel som omsøkt. Kystverket får vidare løyve til å frakte personell, materiell og forsyningar med helikopter i samband med utbygginga. Det er sett vilkår for løyvet. Heimel for vedtaket er § 7 nr. 1 og 3 i verneforskrifta for Svinøya naturreservat.

Vilkår

- Arbeidet skal skje i perioden fom. 1. august tom. 28. (29.) februar påfølgjande år.



- Løyvet gjeld for ein periode på tre år, dvs. til og med 29. februar 2024. Kystverket må søke på nytt dersom tiltaket ikkje er gjennomført innan fristen.
- Ved inn- og utflyging skal det flygast kortaste veg over land dersom ikkje vindforhold eller omsyn til fugl tilseier noko anna.
- Kystverket skal etablere dialog med Ingar Støyle Bringsvor, Støyle 19, 6089 Sandhamn før oppstart av utbygginga for å minimere ulemper for overvakingsaktiviteten på Svinøya.
- Kystverket må sjå til at alt byggavfall og anna avfall blir forsvarleg handtert og levert godkjent mottak.

Anna lovverk

Vi gjer merksam på at vedtaket berre omfattar dispensasjon frå verneforskrifta i medhald av naturmangfaldlova. Nødvendige løyve etter anna lovverk må avklarast med rette myndigheiter.

Klage på vedtaket

Partane i saka eller andre med rettsleg klageinteresse kan klage på vedtaket innan tre veker frå det er mottatt. Klagen må vere grunngitt, og skal sendast til Statsforvaltaren. Miljødirektoratet avgjer klagen dersom Statsforvaltaren opprettheld vedtaket. Reglane om klage på vedtak går fram av kapittel VI i forvaltningslova.

Med helsing

Linda Aaram (e.f.)
miljøverndirektør

Bjarne Otnes
fagleiar

Dokumentet er elektronisk godkjent

Kopi:

Ingar Støyle Bringsvor, Støyle 19, 6089 Sandhamn